

PANTUN

WARISAN INDERA KAYANGAN

BILANGAN 14 – TAHUN 2002

Oleh: WAN NAN BIN WAN MAHMUD (FAWANA)

*Apa nak sesal kepada tudung,
Tucfung saji terendak Bentan;
Apa nak sesal kepada untung,
Sudah untung nasib badan.*

*Ayam Bugis menyabung tali,
Mari berlaga Alor Kesinai;
Adik putih cuba lalu lagi,
Berpaling tengok abang nak kenai.*

*Ayam terbang dari Setul
Balik makan padi huma;
Ayuh abang jangan masyghul ,
Adik nak balik tak lama.*

*Baju cik tangan sekerat,
Habis minyak sebelah bahu;
Perkara sedikit jangan dok melarat,
Kerana banyak orang tahu.*

*Banyak-banyak kera di bukit,
Ada seekor lutung mawa;
Kalau banyak ringgit di poket,
Kawan tak biasa tegur nama.*

*Negeri Perlis bandarnya Kangar,
Pasar jaja ikan pelotan;
Dinda tak nampak tapi dengar,
Tentu sahaja kerja syaitan.*

*Padi pulut beras segantang,
Gula sekati buat tambahnya;
Hujan ribut pohon bergoncang,
Gempa di hati buruk padahnya.*

*Pecah-pecah sepak raga,
Tentang sepak ku sepak juga;
Tujuh bilah keris di dada,
Tentang ku lekak ku lekak juga.*

*Pohon betik pohon petola,
Dipanggil jua pohon papaya;
Adik cantik abang gila,
Adik tak mahu apa upaya.*

*Apa putih di tengah laut,
Ruku-ruku tanaman Cina;
Apa putih di tengah rumput,
Telur kutu disangka bunga*

*Ayam hutan terbang ke hutan,
Turun ke tanah mencari makan;
Kerana digila burung di hutan,
Denak di rumah mati tak makan.*


*Bagaimana nasib bagaimanalah untung,
Tanam pisang tidak berjantung;
Saya umpama kera lutung,
Di mana ranting tumbang bergantung.*

*Bangkit pagi rebus ketupat,
Taruh makan sehari sebji;
Saya nak balik jangan mengumpat,
Minta sebut sehari sekali.*

*Banyak-banyak bintang tinggi,
Ada sebiji bintang tembaga;
Banyak-banyak orang di sini,
Ada seorang berkenan di mata.*

*Orang putih berkereta api,
Cina gedung jahit kebaya;
Tujuh lapis pagar besi,
Bunga sekuntum ku ambil juga.*

*Pagi petang siang malam,
Tinggi rendah panjang lebar;
Di luar pisang racun di dalam,
Penawar mudah, banyakkan sabar.*



*Pohon bendera pohon ketapang,
Pohon kemboja melintang titi;
Anakdara dua sekupang,
Kalau janda segantang padi.*

*Pohon dedalu dalam belukar,
Burung balam patah kakinya;
Setahun dulu gunung terbakar
Baru semalam aku nampak apinya.*

*Pohon geti bunga serangkul,
Ambil galah tergawang-gawang;
Kalau benci khabarlah betul,
Tidaklah kami berulang-ulang.*

*Beribu-ribu biji nangkuk,
Cincin permata jatuh ke ruang,
Kalau rindu sebut namaku,
Air mata jangan dibuang.*


*Bintang tidak terbit pagi,
Diselaput oleh awan putih;
Puan sudi sampai ke mari,
Saya memberi terima kasih.*

*Buah rumbia buah salad,
Pokok tumbuh tepi perigi;
Hidup di dunia kita beradat,
Bahasa tiada berjual beli,*

*Bunga melati di tengah padang,
Mari dikutip anak Cina;
Harimau mati meninggal belang,
Manusia mati meninggalkan nama.*

*Burung punai terbang melayang,
Turun ke sawah makan padi;
Sana kasih sini sayang,
Di mana tempat letak hati*

*Dalam padi ada kaca,
Nampak putih bunga keduduk;
Nak buat apa bersanggul caca,
Indah lagi bersanggul duduk*



*Dua belas dayung berkunci,
Dayung pergi tanah seberang;
Sedikit hati abang tak benci,
Jangan didengar fitnah orang.*

*Harap-harap kelapa puan,
Tidak puan kelapa bali;
Harap ke mari kepada tuan,
Tuan nak tolak ke mana lagi.*

*Ingin pergi Kuala Tembelang,
Tamat berjalan Kuala Cik Bilang;
Sakit di sendi ubat di tulang,
Mana penyakit bolehkan hilang.*

*Pohon kapas dibaling-baling,
Tersangkut kaca koyak seluar;
Melintas dara sambil menjeling,
Terbeliak mata macam nak keluar.*


*Bila petang matahari rendah,
Perahu belayar masuk ke kuala;
Sayang abang jangan susah,
Adik berada di hadapan mata.*

*Buah mempelam buah papaya,
Mari dimakan pagi hari;
Kalau tuan kurang percaya,
Belah dada lihatlah hati.*

*Bukit bernama Bukit Pandan,
Tempat orang tembak batu;
Batu canai disangka intan,
Bila dilihat baru tahu.*

*Bunga tanjung putih bersiri,
Bunga kembang berlapis-lapis;
Lagu canggung lagu asli,
Lagu asal Negeri Perlis.*

*Cik Desa pergi ke laut,
Hendak mencari ikan parang;
Sakit hati rasa nak ikut,
Takut kena tunang orang*



*Dewa sakti melayang ke Daik,
Hendak mencari Dewa Jaruga;
Kalau ada budi yang baik,
Sampai ke mati orang tak lupa.*

*Gunung Jerai disaput awan,
Awan menuju di permata;
Sudah ku ceraimu puan,
Bertali arus air mata.*

*Inderagiri pasirnya lumat,
Kerang bercampur dengan lokan;
Bagai nabi kasihkan umat,
Begitu saya kasihkan puan.*

*Jangan suka menganyam nyiru,
Nyiru dibawa dari Buncit;
Jangan suka menanggung rindu,
Rindu bawa jadi penyakit.*


*Jauh sungguh kota seberang,
Dekat lagi Kota Cik Dayang;
Susah sungguh kasih sayang,
Entahkan tidak kasih sayang.*

*Bunga cempaka digubah intan,
Pecah kelopak di dalam perahu;
Surat dibuka dari lipatan,
Seorang makhluk jangan diberitahu.*

*Cinta Sayang dari Perlis,
Dibawa menari dalam majlis;
Saya umpama kain putih,
Sebarang warna boleh dipilih.*

*Kalau abang membeli jarum,
Boleh adik membeli tali;
Kalau abang minta nak cium,
Upah cium tendang sekali.*

*Kalau nak gugurlah nangka,
Jangan menimpa ranting pauh;
Kalau nak tidur tidurlah mata,
Jangan diingat saya yang jauh.*



*Lemak manis santan kelapa,
Buah berangan dalam padi;
Hitam manis anak siapa,
Rasa berkenan di dalam hati.*

*Kain Bugis punca di tengah,
Dibawa orang jual ke hulu;
Sedang berkasih datang fitnah,
Baik kita berhenti dahulu.*

*Burung pungguk burung dewata,
Hinggap mari di ranting mati,
Sungguhpun duduk jauh di mata,
Kasih yang tetap di dalam hati*

*Elok manis padang saujana,
Adakah limau saya nak tetak;
Ayuh adik abang nak tanya,
Adakah mahu abang nak minta.*

*Kalau ada kemuning pahit,
Belanga baru dijerang udang;
Kalau ada budi yang baik,
Menjadi abu dikenang orang.*

*Kayu sepang mudik ke hulu,
Masak minyak dalam belanga;
Wahai cik abang tunggu dahulu,
Emak balik baru nak tanya.*

*Negeri Perlis Indera Kayangan,
Tempat orang mengambil baja;
Kalau rasa sudah berkenan,
Siaplah duit untuk belanja.*

Rujukan:

1. *Encik Mahmud Wahid*
2. *Encik Wan Khazim Wan Din*
3. *Encik Ahmad Saad*
4. *Encik Hanafi Osman*
5. *Haton Abdullah*
6. *Kurik Kundi Merah Saga*
Kumpulan Pantun Lisan Melayu DBP, 1990